



18. august 2017

UKA 2017/65

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Kommunit inatsimmi pequssutaasut naapertorlugit pisortat ikiorsiissutinik tunniussinerminnut atatillugu qanoq annertutigisumik ikiorsiissutit aningaasannagornagit tunniussisarnersut misissoqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermut atatillugu aamma innersuussutinik saqqummiusseqqunneqarput inatsisitigut qanoq pitsaanerpaamik kusanarnerpaamillu qularnaarneqarsinnaanersoq, atisassat aamma allat meeqqat pisariaqartitaat eqqarsaatigalugit angajoqqaat kiisalu allat meeqqanut angerlarsimasunut isumassuisut qulakkeerisalernissaat siunertaralugu.**

(Inatsisartunut ilaasortaq Nivi Olsen, Demokraatit)

### **Tungavilersuut**

Ajoraluartumik inuiaqatigiinni imaappoq angajoqqaat qitornaminnik sumiginnaasarlutik assersuutigalugu imigassamik aalakoornartortalimmik, ikiaroonartumik hashimik imaluunniit aningaasanoorajunnermik ajornartorsiuteqarneq pissutigalugu. Angajoqqaat tamakku amerlasuutigut pingaarnerutittarpaat aningaasat atornerluinerminnut atussallugit meeqqanut nerisassarsiutiginaq, atisassarsiutiginaq allanulluunniit meeqqat pisariaqartitaannut atornagit.



Tamanna tunngavigalugu pitsaaqaaq Pisortanit ikiorsiissutit pillugit Inatsisartut peqqussutaanni nr. 15-mi, 20. november 2006-imeersumi § 13 imm. 5 naapertorlugu kommunit periarfissaqarmata ikiorsiissutinik aningaasannagornagit tunniussinissaminnut. Paragraffi pineqartoq imatut oqaasertaqarpoq:

*" Nammineq pitsuussutigisamik pissaaleqisoqarpat aallaavittut taamaallaat tunniunneqarsinnaapput pilersuinermit akiligassanullu aalajangersimasunut pisortanit ikiorsiissutissat affaannai. Pilersuinermit ikiorsiissutit aningaasannagornagit tunniunneqassapput. Kommunalbestyrelsip naliliinermini immikkut isiginiartussaavai meerartaasinnaasut pisariaqartitaat isiginiarneqarsimanersut.."*

Inatsimmut taaneqareersumut tunngatillugu aamma naluaarummik peqarpoq (Pisortanit ikiorsiissutit tunniunneqartarnerat pillugu, iliussissatut pilersaarutit, sulisinnaassuseq il.il. pillugit Namminersornerullutik Oqartussat nalunaarutaat nr. 4, 15. marts 2007-imeersoq)

Aningaasannagornagit ikiorsiissutit pillugut nalunaarutip kapitel 6-ani § 16-mi imatut allassimasoqarpoq:

*§ 16. Aningaasannagornagit ikiorsiissutinut ikiorsiinermit akiliuteqartarnek imaluunniit toqqaannartumik akiligassannagortitsilluni allatsitsisarneq siullermeerlutik saaffiginnissuteqartunut tunniunneqarsinnaanngillat, aatsaalli paasineqarsimatillugu, pineqartumit ikiorsiissutit atonerlunneqartartut, imaluunniit ikiorsiissutinik nammineerluni aqutsisinnaanngitsoq, takuulli imm. 3.*

*Imm. 2. Kommunalbestyrelsimit aningaasannagornagit ikiorsiissutinut tunniussinermut aalajangiilernermit immikkut isiginiarneqassaaq, qitornaasinnaasut pisariaqartitsinerat eqquutsinneqarnersoq.*

*Imm. 3. Nammineerluni pitsuussutigalugu pissaaleqisoqalersimappat, imaluunniit meeqqat immikkut ittumik isiginiarneqalersillugit, aningaasannagornagit ikiorsiissutinik siullermeertumik saaffiginnissuteqartumut pisortanit ikiorsiissutinik akiliussisoqartassaaq".*

Demokraatini isumaqarpugut pingaartorujussuusoq, inuiaqatigiittut meeqqat tunngaviusumik pisariaqartitaat sutigut tamatigut salliutittassagigut. Taamaattumik isumaqarpugut, aningaasannagornagit ikiorsiissuteqarsinnaatitaaneq kommuninit qanoq annertutigisumik atorneqarnersoq misissorluarneqartariaqartoq, isumaqaratta tamanna atorlugu pitsaanerpaamik qularnaarneqarsinnaasoo angajoqqaat aningaasanik imminnuinnaq atuinnginnissaat soorlu imigassamut, kisiannili pisortat ikiorsiissutaat atortassagaat pisariaqarnerpaanut soorlu nerisassanut atisassanullu.



Qilanaarpugut partiit allat saqqummiussassaannut taamatullu Naalakkersuisut akissuteqarnissaannut.

**Aningaasatigut allaffissornikkullu pisortanut kingunerusussat**

Misissuineq nammineq aningaasartuutitaqassaaq. Tamatumali ilinniagartuup ukiumut akissarsiaanit, tassa 500.000 koruuninik akisunerunissaa naatsorsuutiginnilarput.

**Aningaasatigut allaffissornikkullu sullivinnut namminersortunut kingunissai.**

Soqanngilaq

**Aningaasatigut allaffissornikkullu innuttaasunut kingunissai**

Soqanngilaq.